

保德州志

卷八至卷十

保德州志

縣長萬泉馬蓆庶總裁

郡人

張寶樞
王贊堃

襄助

郡人張念祖經理

郡人王永明校對

人物第八

殷夢高曰人之名不易副也稟五行之秀居三才之一負鬚眉者自非比跡孔周佩巾幘者或不追蹤任姒幾何弗使官骸爲虛噐而男女爲空名與雖然論人而必求其全將四海之廣百世之遙終無一人故苟忠孝節義一行可稱皆扶輿磅礴川岳靈秀之所鍾也苛以責之刻矣保德沙漠之與鄰要荒之是處鄙哉邑乎顧蓮山聳峙乎其南而黃河環帶乎其北蓋亦晉中一風氣凝聚處也故奇材異敏敦倫飭紀之士代不絕書卽閨閣中共姜伯姬之儔亦未易更僕數焉嗚呼何

才之盛耶作人物志

孝子八之一

忠臣八之二

鄉賢八之三

烈女八之四

節婦八之五

義士八之六

技術八之七

孝子

元

狄元昌 見鄉賢

明

傅 文字彥章靜樂都人天順七年是年例貢遊太學以母老不仕足跡不躡公庭
知州周山慕其高致爲書請第敦請爲大賓其略云恭聞碩德高隱少負聰俊之
資茂遊芹泮繼以優遼之學貢入橋門持終養老親之心高不仕王侯之節誠有
古人之風無徇時俗之態

閻 忠字廷諫義合都人有孝行貢遊太學養親不仕有司延請鄉飲大賓

張 綬字朝儀宣化坊人居鄉恂恂奉親唯謹力學篤行人無間言丁內艱不飲酒
茹葷比葬廬墓三年正德五年貢入太學疏免本州與河曲起運宣大稅糧四千
餘石穀草五千束令存留本處支用爲州永利州人德之詳見奏疏並田賦記仕
至山東齊東縣承歸以壽終萬曆三十年知州韓朝貢請祀鄉賢

馬化龍字子變廷瑩子萬曆二十三年貢歷仕威遠馬邑訓耀州學正少知定省長
篤色養親終盡哀盡禮鄉鄰皆矜式之好恤人之急而不責其償閭有橫逆惟平
氣以待其人每悔謝至訓子孫則凜凜義方不少假借一門雍肅稱積德焉名聞

當路屢隆旌表詳允大賓壽七十七歲子上錦見恩拔上錫見儒官上覲增廣生上行見歲貢

賈居奇字異鍾宣化坊人萬曆三十年恩貢歷陞平涼府授有孝行屢蒙旌表李士光士元弟事親盡哀盡禮禔躬以厚以義有司旌獎

高 翀宣化坊人年十九割肱愈親司院旌獎李孝廉爲之傳

李士冠士光弟上事老母下撫雙孤皆盡其道有司給扁旌獎

國朝

高之麒字明春廩生母死居喪憂號病卒知州蘇東柱扁曰眞孝子

忠臣

明

戴 辰所千戶嘉靖三十七年寇大舉圍豐阜城五日辰奉檄往援顧趙夫人曰後事畀爾謹奉舅撫孤遂擐甲躍馬直薄寇營轉戰重圍三馘寇首日暮猶提示城

上以堅守者之心矢盡力竭竟沒於陣寇亦驚畏夜解圍去次日尋屍刀砍箭傷一十七處事聞贈明威將軍指揮僉事時人多有詩哀挽見藝文子延春見武官王昌齡所百戶連中三科武舉嘉靖四十一年西豹峪挺身拒寇遇害

徐堯臣所百戶嘉靖四十五年十一月領兵於唐家會龍王廟前打水寇衆踏冰入犯堯臣拒堵力戰面中五矢刀傷七處遂沒於陣事聞卹錄加陞副千戶子棟見所本

錢棟浩之子由守備歷陞老營副總兵隆慶四年陣亡贈都督指揮僉事子燁見武官

姜名武字我揚中天啓壬戌武進士授大同威遠城守備有功歷陞通鎮驍騎左營副總兵調保定總督標下中軍都督僉事崇禎十五年援豫至朱僊鎮力疾從戎與親丁耿道明姜業隆王豹朱喜貴白玉柱楊守薦莊登科七人俱戰死總督楊文岳疏稱姜名武詩書從戎孝廉素著致身於困苦之際盡忠於危急之秋一段

肝腸當與河山不朽請加贈卹長男宗呂亦具疏言臣父無屍可裹有魂難招云云情辭懇摯其疏詳見藝文部議贈特進榮祿大夫左都督子孫世襲錦衣衛百戶會國變未下子宗呂祚呂師呂述呂孫栩櫛櫛果俱見選舉志有本傳亦載藝文

韓友范字一咸銳曾孫中萬曆戊午鄉試初授河南鹿邑知縣創建城池禦寇有功士民建立生祠行取工部主事陞本部郎中歷陝西慶陽知府再有禦寇功陞神木兵備道副使闖寇來攻闖城勸公投順公不從及城陷闖賊欲用公公怒罵夜以金簪自刺不死賊聞之不忍遽害誘至山西太原北小店仍欲授公以官公曰吾所事者聖帝明王未見有耿而帝者遂殺之公初離神木時獨有一僕來王從及遇害扶柩歸里葬於大西嶺神堂梁五子昌晉鼎俱庠生卓見例貢彞廩生首貢孫承先光先俱庠生輝先見舉人

高日晁字翼皇宣化坊人中崇禎丁丑武進士任山西寧武關遊擊逆闖陷城同總

兵周遇吉血戰死之

常道行字昭五所人工制藝嘗兩擬元屢取書院讀書萬曆四十六年貢授黑水監正闖寇破城罵賊死之

楊于階字翼極長樂都人崇禎元年貢授陝西隴西知縣以催科不力降河南彰德府照磨復任河南濟源知縣闖賊陷城死之子永芳見歲貢

鄉賢

宋

趙寧栢森村人自始祖至寧十世不分居家衆五百餘口治平二年知府州折繼祖奏聞欽賜米絹寧將米絹納回乞賜旌表本州知州張堂代奏奉旨令吏部侍郎趙輝先戶部侍郎歐陽節仍賜米絹并旌其門再勅除寧一司一務二稅並免諸色差徭號其都爲義門大觀四年子戶部尙書趙演翰林院學士趙惠諫議大夫趙昌姪兵科給事中趙戩等將勅命刻石詳見古蹟等類

金

郭汝翼其先諱京者平陽府人徙居保德遂占籍焉族屈繁盛俱業儒三世中儒選汝翼與弟汝霖俱以易學中鄉舉汝翼授朝請郎集賢院校理墓在城南門外

元

狄元昌字世隆義門西庄人宋狄武襄公青之後系出汾州西河縣曾祖順旺祖思憂父寬豐財濟人公善騎射以多藝稱慷慨樂施凡窘迫求者指困貸施不少綬有不能償者輒焚其券曰吾身後不可令子孫徵負於人術士相公多陰德后必昌可高其門果得子八人孫十二人有大顯者公暨弟元勝元祿提領十二郡管州崞州等諸驛傳置以孫東山貴贈中順大夫兵部侍郎上騎都尉追封天水郡伯宅墓在西庄子琮見下

狄琮字子玉軀幹魁梧尙氣節有并州豪俠風讀書了大義慨然以功名爲心辭親詣京識者薦名裕宗皇帝宿衛晉先王委身焉至元庚寅王封梁開藩雲南擢

奉議大夫王傳司馬府中事咸諮之王改封晉鎮西邊瓶內史府轉朝列大夫內史府司馬暇則講貫經訓凡諷諫必盡忠王每嘉納未幾進大中大夫知無不言大德辛丑王薨哭之慟至嘔血曰吾尙可以生乎癸卯召子東山諭之曰爲人臣子惟忠與孝爾其勿違言訖梁棟間有聲如磬視之逝矣時春秋方五十墓在天水郡伯墓左子東山見下

狄東山爲人倜儻不羈善繼先志剛正明達有爲有守初仕中書舍人河間治中監察御史同知大都路都總管以材選授中書禮部郎中進大中大夫同僉宣徽院事墓在天水郡伯墓右

李謙字受益號野軒其先太原平晉縣人宋末徙居本州兄弟三人爲教各異謙以明經舉累官翰林院大學士次弟道士名志和號元希真人三弟僧名行眞投禮承天寺眞安爲師至元七年石刻宗支圖及兄弟三人分受三教詩至今尙存惜乎多剝落翰林學士秋澗王公仲謀公望陳公儼俱有詩誌美舊志有遺宅在

上街之西今無考墓在城南王寨邱山

郭伯順汝翼之後性惇朴通五經尤精於易蔚爲儒宗恬於利祿有司屢辟不就鄉里敬尙士類多從之遊大德八年應奉翰林文字承事卽同知訓誥兼修國史編修官孟忠爲作譜記有石刻今無考

明

趙彥亨字世通宣化坊人洪武年進士授監察御史有直聲降江西安福知縣

高爵字良貴長樂都人中洪武年鄉舉授監察御史建議朝紳動色

高已升字登雲長樂都人永樂五年貢授兵部職方司主事改工部收發各色人匠三萬二千一百六十四名收通政司送到詞狀三百八十四帑告人四百三名奉本部劄付委官官舊作營提督醫士人等醫養過病疾人匠三萬八千四百七十三名三年給由仍前職十九年送吏部欽蒙記名回籍候用墓在神堂梁

張綬見孝子

萬世德字伯修所人嘉靖間改偏頭所嘗以所百戶署岢嵐捕務受責辱遂棄去淬志讀書中隆慶庚午鄉試辛未聯捷除寶坻知縣行取兵部主事累官經略陝西七鎮歷右布政使陞海防巡撫右僉都御史征倭寇以石灰鑛煮海賊徒燒死無算萬曆戊戌經略朝鮮特進一品服色辛丑任薊遼總督癸卯卒於官遣官諭葬贈兵部尙書廕一子入監戊申入祀偏頭所學鄉賢祠略云高文華國制科開千古之荒閭抱匡時經濟係萬邦之望運籌西北七陲鞏磐石之安仗鉞東南八道絕跳梁之警矢心致主狼封瀚海播勳名盡瘁捐軀麟閣雲臺圖姓字安攘弘裨於中外展也英雄孝友無間於家邦卓哉道範甲寅大州又公舉入祀略云粹品高文直足範今傳後宏猷亮節雅能安夏壤彝保德實係本源偏關特其僑寓宜從輿論用範舊邦子化孚見武官邦孚錦衣有孚戶部照磨國孚恩生

崔士成珙之子字志甫義門都人中萬曆甲午鄉試嘗修州志登甲辰二甲進士授戶部雲南司主事父母妻皆受封贈丁內艱起補兵部車駕司主事辛卯解餉宣

泰過里卒公舉入祀鄉賢略云真誠恪慎直探聖學本源慷慨周詳雅負帝臣經濟遊泮時名已聞於當路計偕後功卽被於本邦如無地之糧遠輸之稅爲害烈矣三出而水火頓釋裨益甚巨軍卒他役垣墉易頽憂方大也一言而金湯永固利賴無窮若憐老恤貧特其小者耳子嵩庠生上達見歲貢孫銓庠生

王 邵字二彌所用長子泰昌恩選天啓辛酉舉人登崇禎辛未進士館選庶吉士授翰林院簡討編纂六曹章奏直起居注經筵展書諭祭代藩冊封其世子事竣疏陳所見民隱及地方陋弊上諭撫按行之嘗分較禮閣典試三楚拔取名流一時推服先是崇禎庚午流寇王嘉胤陷河曲府谷屢犯州城公寢食城頭運籌方略爲城守計嘗設計擒嘉胤妻獄之賊至命以長竿縛致玄牆外示賊賊怒度不可攻乃引去城賴以全八年請立本州營伍創築南關蠲除增額鹽票州人德之著有庚午守城紀略弭盜已試錄相勸俚言邁征齋遺稿行世公初以病告給假癸未起爲南京國子監司業不赴未幾卒葬東山陽塔士民公舉鄉賢尙未果行

子立本宗本俱見恩拔有傳列藝文志

列女

宋

馬氏 趙寧妻以十世同居勅封配德夫人

折太君宋永安軍節度使鎮府州折德辰女代州刺史楊業妻性警敏嘗佐業立戰功後太平興國十年契丹入寇業進兵擊之轉戰至陳家谷口以無援兵力屈被擒與其子延玉偕死焉太君上書陳夫戰沒由王侁違制爭功上深痛惜詔贈業太尉除王侁名

慕容氏 楊業孫文廣妻州南慕塔村人雄勇善戰

見真志

明

郭氏 翰林院簡討王邵妻崇禎戊辰流賊王嘉胤據府谷窺保德邵同州人死守氏脫簪珥佐犒師費又嘗傾奩命子立本建永濟橋見二彌先生文集

王氏廩生劉三顧妻康熙壬戌進士祖舜之母初氏適三顧時年止十九前母子祖堯纔七八齡氏恩勤撫育一如已出賢三顧早歿諸子俱幼少子祖黃方週歲氏以母兼父端心督課底于有成祖舜以進士起家爲廣西懷遠令祖堯歲貢餘子皆遊庠食餼時人皆以爲有古列女風焉卒時年八十有四

節婦

死節

張氏靜樂都人劉希明妻家殷實生二子夫被寇殺氏不食哭死御史宋纁表曰貞烈月給衣糧於子

崔氏所人嚴機妻萬曆間人生子方週歲夫死視殮畢夜縊死於棺頭知州楊從書登吊嘆服懸扁旌獎

陳烈女許字州民郭姓者郭無賴父母議欲改適女自縊死奉 旨建坊立祠

傳

詳見

張氏 郭氏 王氏俱明經略陳奇瑜妾

詳見傳

楊氏貢生馬上行妻夫故氏縊死有司申請旌獎扁曰節烈可風子愉見歲貢孫成

功治功俱庠生曾孫眉

見武舉

康氏生員楊璋妻夫故氏年幼無嗣視殮畢自縊棺頭有司申文旌獎

以上明代

馬氏宣化坊張文蔚妻夫故氏年二十七視殮畢服毒死知州蘇東柱作詩祭之郡人和者甚衆見藝文志

李氏夫死於兵收者將至氏提刀俟於門將行刺比至知不諧遂自刎死惜逸其夫之名

以上國朝

守節

高氏宣化坊人張守信妻生二子夫卒氏年二十六守志孀居撫養幼子成立年七十卒

趙氏宣化坊人賈茂妻夫卒氏年二十四家貧苦節人無間言年八十卒

劉氏宣化坊人張敬妻懷孕六月夫卒氏年二十一後生子仲明娶婦成家年七十卒

張氏宣化坊人吳馨妻翁姑稱孝里人稱賢夫卒遺前妻子相七歲爵五歲所生子梅樸方襁褓氏年二十二誓不再嫁撫相爵梅樸相待如一家貧苦節內外無間有司旌其門

曹氏宣化坊人張廷學妻通書史年二十六夫卒子希載七歲希良五歲撫養成立按院仇復其家

白氏宣化坊人高章妻生子在乳抱夫卒氏年二十三撫子成立送舅姑終里人稱賢年六十卒

王氏靜樂都人呂公庭妻生子愛方襁褓夫亡氏年二十一甘貧守節萬曆初年知州周壩申請懸扁旌獎

張氏所人袁汝椿妻生子林秀甫兩月夫亡氏年二十一哀毀萬狀辛苦備嘗日攻